

Zastupnik Adnan Solaković na Sedmoj Radnoj sjednici Skupštine Kantona Sarajevo, održanoj dana 07.10.2015.godine, u okviru tačke Dnevnog reda, „Poslanička pitanja, inicijative i odgovori“, a u skladu sa Poslovníkom Skupštine Kantona Sarajevo postavio je zastupničko pitanje kako slijedi:

„Budući da je tragično stradalo dijete na jednom od sarajevskih igrališta, pokrećem inicijativu da se ovoj skupštini dostavi detaljan izvještaj istrage o okolnostima nesreće i odgovornosti nadležnih. Poznato Vam je da je napravljeno istraživanje koje su obavili mediji da 90 % igrališta ne zadovoljava čak ni elementarne uslove sigurnosti. Ko je odgovoran za ovaj nemar i neodgovornost?“

Odgovor na zastupničko pitanje:

Dana 04.10.2015 godine u 13,55 sati od strane dispečera ZZHMP KS putem telefona obaviještena je dežurna služba Treće policijske uprave, da je na igralištu kod Osnovne Škole "Skender Kulenović" u naselju Dobrinja došlo do povrijeđivanja jednog djeteta.

Odmah po dobijenom obaviještenju na lice mjesta upućeni su policijski službenici, koji su na otvorenom javnom igralištu u ulici Mustafe Kamberića zatekli ekipu ZZ HMP KS kako ukazuje ljekarsku pomoć jednom djetetu. Nakon neuspjele reanimacije od strane ljekara, istoga dana u 14,27 sati konstatovana je smrt djeteta P.S., rođen 16.08.2003 godine u Sarajevu.

O svemu navedenom istoga dana putem telefona obaviješten je dežurni tužilac Kantonalnog Tužilaštva Kantona Sarajevo, koji je izašao na lice mjesta i rukovodio uviđajnim radnjama, kojima je prisustvovao i vještak sudske medicine.

Od strane uviđajne komisije konstatovano je da se leš djeteta nalazi na otvorenom javnom igralištu u ulici Mustafe Kamberića do broja 8 općina Novi grad, tačnije na umjetnoj travi, u ležećem položaju na leđima, sa ispruženim nogama i desnom rukom uz tijelo dok je lijeva ruka u polusavijenom položaju naslonjena na grudni koš.

Vizuelnim pregledom leša uočeni su tragovi izlučevina iz usta i nosa, kao i tragovi izlučevina pored leša na umjetnoj travi.

Izvršenim pregledom navedenog igrališta uviđajna komisija je konstatovala da je isto ograđeno metalnom rešetkastom ogradom na kojoj je načinjeno više nepravilnih otvora u ranijem periodu, dok se na igralištu nalaze dva gola metalne konstrukcije, koji nisu bili fiksirani niti pričvršćeni, bijele boje, dimenzija rama 320 cm x 210 cm, napravljeni od okrugle metalne cijevi od 100 mm i od 40 mm, od kojih je jedan, koji se nalazi naspram ulaza broj 8. stambene zgrade u ulici Mustafe Kamberića, zatečen na udaljenosti od 220 cm od zaštitne metalne ograde igrališta, položen na tlo.

Lice mjesta kao i leš djeteta su fotografisani od strane kriminalističkog tehničara, a po naredbi navedenog tužioca. Po završetku uviđaja leš djeteta je vozilom KJKP "Pokop" preveženo u prostorije prosekture "Bare" radi vršenja tjelesnog pregleda odnosno obdukcije, ukoliko bude potrebno.

Operativni materijal sačinjen po osnovu poduzetih hitnih kriminalističko tehničkih mjera i radnji dana 06.10.2015 godine dostavljen je u dalju nadležnost Kantonalnom tužilaštvu Kantona Sarajevo.

Dana 09.10.2015 godine u službenim prostorijama Treće policijske uprave u svojstvu svjedoka saslušana su dva svjedoka očevica događaja, o čemu su sačinjeni zapisnici.

Na osnovu naredbe postupajućeg tužioca provedeno je vještačenja metalne konstrukcije gola od strane vještaka građevinske struke koji će svoj nalaz i mišljenje dostaviti Tužilaštvu.

Izvršenim provjerama u nadležnim službama općine Novi Grad utvrđeno je da općina, kao i javno preduzeće LOKOM ne upravljaju pomenutim igralištem.

Policijski službenici pod nadzorom postupajućeg tužioca, nastavljaju poduzimanje dodatnih mjera i radnji na rasvijetljavanju i dokumentovanja navedenog događaja.

S poštovanjem.

MINISTAR

Predrag Kurteš